

Manfred Zirkelbach

MaZi- Ned auszudenke

Die Angst im (Bienen)Staat

Ganz schwere Zeide stenn ons befür. Die Krise mid all ühre Aüswirkunge hadd jetz aach onnern Staat, den Bienenstaat erreichd. Hochkonjunktur on Vollbeschäftigung wor ogschd in die ledzde Zeid. Kersche, Apfl, Weide on Hoselnöss on wos weiß ich alles hömm geblüehd wie verröckd, on des alles off e moal. Mir Ärwedsbiene wosde gor ned, wu mer zuerschd hielang sollde. Mir hömm onnern Staat mid allem versorchd, där Honich is gflosse, ühr glebbd des net. Mir hömm ons grad buchstäblich den Orsch aufgeresse. Owr do gidde jo so Räuber, die denke, sie könnde onnern Staat für sich aüsgenütz on nahme ons des meist widdr weg, lasse ons grad noch so vill, däss mir hald noch so üwern Wenter komme. Owr nu? Alles obgeblühd! Wu mer hieguckd, kee Kersche-, kee Apflblüete, nix, mid wos mer sich die Tösche voll gemach könnde. E boor lombiche Löwenzahn off die Wiese. On wann mir ned aufpasse, nahme ons die „Heüschrecke“ aach noch des bisle weg. Onnere Könichin on ühr Ministr, die Drohne, die drohne derweil off ührn Drohn on wisse sich kenn Roat wies weddr geäh soll. Vielleichd stellde mer ons e weng Zuckerwassr hie als sogenennt Bientafel, annere soche, mir käme doch aach mid Har(t)z ganz guet üwer die Runde. Üwerlechung wern ogschdelld, ob mer ned durch Üwernahme vo annere Bienevölker on gleichzeidichem Näüswurf ausm Stock vo zich Tausende Ärwedsbiene den Staat sanier sölld. Ower do zöcherd mer bei die Drohne noch, wäll jo heüer aach noch die Wohl vo däre neü Könichin befür stett. Ehrlich, wos mache mir Biene däre Zeit net alles durch.

Ned auszudenke